

JOSUÉ

Diosan Josué usakian ñu 'anun ka bana

1 ¹Usa 'ain ka Moisés Nukën 'Ibun uni ax ñukë 'ain, Josué an Moisés 'akinkë Nunnën bëchikë a Nukën 'Ibun ësokin kakëxa: ²'Ën kaisa uni Moisés ka ñuaxa, usa 'ain kamina bërí min Jordán kakë baka kamabi Israel unikama shitákinbiani, a 'inánuxun 'ën ká me a mitsu 'inánun kuantí 'ain. ³'Ën Moisés kásabiokin kana anu mi kuankë mekama a 'ën mitsu 'inánti 'ain. ⁴'Ën mitsu 'inánti me ax ka anu uni 'ikëma me anua 'ikë aín bashikama Líbano kakë anuaxbi kuantankëx anua baka rara Éufrates 'ikë akama këñunbi kana anua hititas unikama tsókë parúmpapa anu sënénbi mitsunan 'inun 'inánti 'ain. ⁵Uínbi ka uisaxunbi mibë 'akanankin mitsu kanantima 'ikën, 'ën kana Moisés 'asaribiokin, 'ën kushínbi 'akianan uínsarabi ënkinma mi 'akinti 'ain. ⁶Usa 'ain kamina rakuéti sinanima kushikanti 'ain, min kamina ënë unikama me 'inánti 'ain, a me 'inánuxun kana 'ën mitsun chaitiokëkama kakën. ⁷Usa 'ain kamina 'ën kakësabi oí rakuéti sinanima kushiti 'ain, 'imainun kamina 'ën uni Moisésnëan 'ën kakëxun mitsu kuënëoxuan bana ashi tanti 'ain. A banakama kikësokinbi 'akëbë ka kamabi min 'akë ñukamax

upí 'iti 'ikën. ⁸'Imainun kamina uinsaranbi ënkinma a tanti bana 'ën 'amikëxun Moisésnën kuënëo bana nètën isanan iméribi isti 'ain, usakin 'akin kamina ënkinma ënë bana kikësabiokin 'ati 'ain. Usakin mi 'akëbë ka kamabi ñu mitsun 'akë ñukamax upí 'iti 'ikën. ⁹'Ën kana mi kain usa 'ain kamina kushi sinani rakuétima 'ain. Usa 'ain kamina rakuékin kana 'aíma kixun sinántima 'ain, min 'Ibu Dios 'ëx kana mibë uinu karamina kuaní anubi 'iti 'ain.

Josué 'imainun Israel unibu Canaán kakë menu kuanux mënio ka bana

¹⁰Usa 'ain ka Josuéñën Israel uni aín kushibu ësokin kakëxa: ¹¹Anua 'ikankë atun xubu kamanubi kuankin kamina kamaxunbia atun pibianti ñu mëníonun kati 'ain, ënuax rabé 'imainun achúshi nètë 'ikëbë kananuna Jordán kakë baka sikakiani kuanxun Nukën 'Ibu Diosan nu 'inánti me a bitsi kuantí 'ain. ¹²Usokín atu katankëxun ka Josuéñën Rubén 'imainun Gadnën rëbúnkikama kanan Manasésnën rëbúnkiribi kamaira kakimabi 'itsamashi, akama ësokin kakëxa: ¹³Míkaman kamina sinánti 'ain, Nukën 'Ibun uni Moisés ax ka ësai kia bana a nun 'Ibu Dios an ka anumi upitax bukukanti ënë me 'inánti 'ikë kixun nun chaitiokama

kakëxa. ¹⁴Usa 'ain kamina mitsun xanu min bakë bëchikë 'imainun ami 'arakakë ñuinakama këñunbi Moisésnën mitsu 'inan me Jordán kakë baka nëkë manan ënubi ëbianti 'ain. Èbiani kamina ax 'akanainsa unikamaxëshi aín manë xëtokë bibiani mitsun xukénkama ka 'akanania 'akini kuantu 'ain, ¹⁵Nukën 'Ibun 'akinkëxuan atúnribi ainanbi 'itanun 'ibuakin me binun atu pain 'akinti 'ain. Usakin atu pain 'akintankëx kamina amiribishi Moisés Nukën 'Ibun uni an mitsu 'inan mekama baka nëkë manan 'ikë ënubi utankëxun mitsunanbi 'inun biti 'ain.

¹⁶Èsokin kakëxun ka atúnribi Josué kakëxa:

—Asabi ka min nu kakësabiokin 'ai kananuna uinu karamina nu xuti anubi kuantu 'ain. ¹⁷Usa 'ain kananuna min kakëxun min bana tankin 'anan, Moisésnën kakëxun 'ásabiokin 'ati 'ain. Usa 'ain kananuna nukaman kuënin Diosan ka Moisés 'akiansaribi okin miribi 'akinti 'ikën. ¹⁸Usa 'ain ka uin kara min kakësabiokin 'aisamatani kërutia a unix 'akë 'iti 'ikën. Usa 'ain kananuna nun mi kain uisai kara uni 'ikëbëbimi rakuëaxma kushinun.

**Josué nën rabé uni
Jericó kakë ëma
ñachatanun xuá bana**

2 ¹Achúshi nëtën ka anua Israel unikama bukukë Sitim kakë anuxun rabé uni Josué nën unékianxuan istánun xuakëxa:

Xukin ka kakëxa anu kuanxun kamina Canaán kakë me ñachanan anua 'ikë Jericó ëma a isikuanti 'ain. Usakin kakëx ka a uni rabé kuantankëx bëtsi bëtsi unin 'ain nami 'akë xanu Jericó ëmanu 'ikë Rahab aín xubunu ñantan 'uxi bërúakëxa. ²Aínbi ka anu 'ikë unin ñuia kuabianxun Jericó ëmanu 'ikë 'apu ësokin kakëxa:

—Uiti israel uni sapi kaisa nun me ñachai ënë imé uonxa. ³Usakin kakëxun ka a ëmanu 'ikë 'apun aín suntáru anu kuanxuan Rahab katánun kixun xuakëxa:

—Xukëx kuanxun ka anu bëbakin kakëxa, min xubunu bëbakë unikama a kamina chikínti 'ain, atux ka nun me ñachai uaxa. ⁴Aínbi ka a xanun a rabé atux ukëmapan 'aínshi unëxun ësokin kakëxa:

—Asérabi ka a unikamax 'ën xubunu uaxa, usai ukëbi kana uinu 'ikë unira kara 'ën 'unánkëma 'ain. ⁵Usa 'aish ka bari kuabuti ñantabukëma 'aínshi atux kuanxa, mitsúnbi kamina 'unan xupibutia bari kuabuti ñantabukëbëtainshi ka anun ëmanu atsínti xëkuë xëpúia, usa 'ain kana uin kara atux kuanxa kixun 'unaniman. 'Aínbi kamina mitsun bënëtishi kuankin nuibianxun sapi kamina kuania atu nukuti aín kixun ka xanun kakëxa.

⁶A xanunbi ka aín xubu manámi buánxun anua xapusa lino kakë barionti tsamankë a mëu unëkë 'iakëxa. ⁷Usakian kakë-xëshi ka 'apun suntárukama ax

unikama me ñachai ukë ax isa anun kuanxa kixuan xubu 'ibu an paránkin kakëx Jordán kakë baka, ami kikiani kuani anunribi anunribia uni sikarakëkë anubi bëbakin nuiakëxa. Usokin nui kuania suntárukama ax chikikian-këma 'aínshi an xëputi bëruankë unikama a ëmanu anun atsínti xëputi xëpúakëxa.

⁸Usa 'ain ka Israel uni rabé ax 'uxkëma 'aínshi, Rahabnën aín xubu manámi kuaruxun uni rabé a kakëxa: ⁹Ën sinánkëxun ka Nukën 'Ibun mitsunan 'inun ënë me mikama 'inánti 'ikën, usa 'ain kananuna nukamax 'itsaira rakuétin. Usa 'ain ka axa ënë menu tsókë unikama mitsux ukë kuati rakuëtan bamaia. ¹⁰Nun kananuna 'unanin mitsux Egipto menuax chikíkuätsini ukëbëtan ka Diosan anun sikarakënun parúm-papa xónsa kakë a aín nëbétsi ësiki panárabënun 'imiakëxa. 'Imainun kananuna 'unanin mitsun kamina Sihón 'imainun Og, amorreo kakë unibunën 'apu rabé axa Jordán kakë baka 'ukëmanan bukukë a aín unikama këñunbi maërakanun këñuakën. ¹¹Usakin mitsun 'akë kuati kananuna nukamax 'aisamaira rakuëakën, usa 'ain ka uinu 'ikë 'ën aintsikamaxi mitsubë 'akánanti kuëënima. Nun kananuna 'unanin mitsun rabikë Dios ax ka naí manámi 'ikë-saribi 'ianan ënë menu kushiira 'ikën. ¹²Usa 'ain kana mi ñukatín ënuxunbi kamina Nukën 'Ibun anën sinanátëkëntimokin asé-rabi

'ë kati 'ain, 'ën aintsikama kamina mitsu bërí 'ën 'akësaribi okin ënë ëmanu 'ikë unikama 'akinbi 'atima 'ain. Asé-rabi karamina këmëima 'unánun kamina 'ë kati 'ain, ¹³Usa 'ain kamina ënë me bitsi atsínkin 'ën papa 'ën tita 'imainun 'ën xukén 'ën rarëbakë, 'ianan abëa 'ikë unikama këñunbi nu 'atima 'ain. ¡'Akinma kamina nukama këñunbi ëñëmiti 'ain! ¹⁴Ësokin kakëxun ka rabé unin kakëxa: Nun ënë me bitsi ukin min aintsikama 'aia ka Diosan nuribi bamanun 'imiti 'ikën, usa 'ain kamina nun mi kakë bana ënë uibi ñuixuntima 'ain. Usa 'ain kananuna Nukën 'Ibun ënë me 'inán-këxun bixun nukaman mi upíokin 'akinti 'ain.

¹⁵Usa 'ain ka Rahabnën xubu ax anun ëma kënëkin buinarakin kënëkë amibi birukin a manámibi 'akë 'iakëxa, usa 'ikë ka atun me ñachai kuankë uni rabé a itsi nénkë təkërekaxun anun aín xubu xëkuë chukúma manámi 'ikë au nanopakëxa. ¹⁶Nanpákin ka kakëxa: Ënuax kuantankëx kamina an mi baritia 'apun xukë suntárukaman mi mërakëma 'aínshi ninu unëti kuanti 'ain. Anu kamina rabé 'imainun achúshi nëtë atux pain ëmanu utëkëntamainun unëti 'ain. Usa 'ain kamina anuaxbi min nëtënu kuanti 'ain. ¹⁷Ësokian kakëxun ka uni rabé anribi kakëxa:

—Nun kananuna sinanátëkëntimokin min nu kakë-sabiokin asé-rabi 'ati 'ain. ¹⁸'Aínbi kamina nux

ënë menu bëbai ukëbëtainshi, itsi achúshi xónsa anun nux 'ibúkë ënë min xubu xëkuë chukúma ënu bënëkinshi bëntanti 'ain. Usakin 'anan kamina min xubunu min papa min tita 'imainun min xukén min rarëbakëkama 'imainun min papan aintsikamaribi bënëkinshi timëti 'ain. ¹⁹Uix kara min xubunuax ëman chikitia 'akëx bamaia ax ka aín 'uchabi 'iti 'ikën; usa 'ain ka ax nun 'uchama 'iti 'ikën. 'Aínbi ka uin kara min xubunu 'ikë uni anu atsínxun 'aisamoia ax ka nux 'uchakë 'iti 'ikën. ²⁰Usa 'ain kamina uinu 'ikë unibi nun mi kakë bana ënë ñuixuntima 'ain, usama 'ain ka asérabi usakin 'axúnun mi kakë ënëx usabi 'iti 'ikën. ²¹—Asabi ka usa ka 'iti 'ikë —kixun ka xanun kakëxa. Katankëxun ka na kuantanun xuakëxa. Xukëx kuankëbëtan ka aín itsi xónsa anun sënkikianxa 'ibúkë a bitankëxun aín xubu kaxú xëkuë chukúma anu bëntankëxa. ²²Usokian 'akëx ka an me ñachai ukë uni rabé ax kuantankëx rabé 'imainun achúshi nëtë 'imi ninu unëakëxa, usaía 'imainun ka suntárukaman mëránuxumabi mekama okin pékasmakin baribiani amiribishi Jericó kakë ëmanu kuantëkëankëxa. ²³Kuantamainun ka an me ñachai kuankë uni rabé axribi anua unëké ni anuax kuanx, Jordán kakë baka shitákiani anua 'ikë anu kuanxun Josué usaía 'ikë kamabi ñuixunkin. ²⁴Ësokin kakëxa: Nukën 'Ibu ka asérabi a mekama binun nu 'akinti 'ikën.

Usa 'ain ka a menu 'ikë unikama 'itsaira numi rakuétia.

Israel kama Jordán kakë baka sikarakëa bana

3 ¹Usakian kónkëx ka pëkara-këma 'aínshi, Josué 'imainun israel unibu Sitim kakë anu paia bukukë anuax kuantankëx Jordán kakë baka anu bëbakankëxa; bëbatankëx ka sikarakëxun anu pain 'ikankëxa. ²Anuxun ka rabé 'imainun achúshi nëtë 'ikëbëtan aín kushibunën anua 'ikankë akamanubi kuankin ³'ianan ka ësokin Israel unibu kakëxa: Uínsaran kaina sacerdote levita unikaman anu Nukën 'Ibu bana kuënëokë nankë a bunántisa kurin ratátakakë a buánkania iskani anun kamina uinu kaina 'ikani anuaxbi chikíkiankin nuibiankanti 'ain. ⁴Usai kuankin kamina uimi karamina kuani a 'unánkanti 'ain, uinu 'ikë mitsúnbi kamina ënë me anu nikin 'unánkëma 'ain. 'Aínbi kamina bunántisa okin 'akë kurin ratakakakë anua Diosan bana kuënëokë nankë a 'uramaira oíma, a kaxu achúshi kilómetro 'ura kuanti 'ain.

⁵'Imainun ka Josuénën ësokin atu kakëxa: Mitsux kamina iméishi Nukën 'Ibu kara aín kushin uisakin ñu 'aia isnux upiti mënókati 'ain. ⁶Kanan ka sacerdotekamaribi kakëxa: Bunántisa okin 'akë kurin ratakakakë a 'ukëmëua a tanti banakama 'ikë ënë 'iarukin bibianx kamina a rëkuémibiani kuani unikaman ismainun abë

baka sikarakëti 'ain. Usakin kakëxun ka sacerdote kaman bunántisa okin 'akë kurin ratakakakë a unikaman ismainunbi buánkëxa.

⁷Usokëbëtan ka Nukën 'Ibun Josué kakëxa: Bërí ka Israel unikaman ësokin 'ën 'akëbëtan mix kamina 'ën kaískë uni atun 'apu 'ai kixun 'unánti 'ikën. Usa 'ain ka 'ën kana Moisés 'akiansaribi okin mi 'akini kixun 'unánti 'ikën. ⁸Minribi kamina sacerdote an bunántisa okin 'akë kurin ratakakakë a 'ukëmëu 'ikë a tanti banakama buannun kati 'ain, kuani ka Jordán kakë baka aín kuëtsín amáti nirakëkëbëa ësiki-këbë 'urira kuani anu nirakëti 'ikën.

⁹Usakin kakëxun ka Josué'n Israel unikama kakëxa: Nëri kamina rikuatsinti 'ain Nukën 'Ibu Diosan ka ësokín nu 'akinkin ñu 'akatsi kixaxa mitsu kanun. ¹⁰Ax ka nubë 'ikë kixun nukaman 'unánun ka Diosan aín kushínbi aín menu bëbakín nun cananeo, hititas, heveos, ferezeos, gerge-seos, amorreos 'imainun jebuseos akamabi aín me bikuanti 'ikën. ¹¹Kamina kuakanti 'ain, Nukën 'Ibu kamabi men 'ibu 'ianan bunántisa okin 'akë kurin ratáta-kakë anua kamabi aín bana 'ikë aka sacerdote unikaman mitsun ismainunbi Jordán kakë baka a sikarakëkinti 'ikën. ¹²Usa 'ain kamina mapai rabé 'imainun rabé ñaká uni anua achúshi achúshi Israel unikama kaisti 'ain.

¹³Uínsaran kara sacerdotekaman bunántisa okin 'akë kurin ratakakakë anua Nukën 'Ibun kamabi men 'ibu ain bana a buani tapukikiankëbë ka tëarabëti amo rabé chairui aín rëbumiax 'ia ubúkë ax tikimainun kuabúkë ax amorabé chitëti nunkuruti 'ikën. ¹⁴Ësokín kaia Josué sënënkëbë ka Israel unibu anua 'ikë anuax bunántisa okin 'akë kurin ratakakakë anua a tanti banakama 'ikë a buani sacerdotekama kuankëbë a kaxú Jordán kakë baka shítati kuankankëxa. ¹⁵Kuankian bunántisa a pain rëkuénkin biani sacerdotekama baka tapukikiankëbëshi ka aín xobukë nëtëti baka tëarabëakëxa. Ax ka anun ñu 'apákë biti 'uxë 'aia Jordán kakë baka mita 'ain chaiira 'inun 'ëkë 'aish kuëtsëkënkëma pan 'ain 'iakëxa. ¹⁶Ënëx ka anua israel unibu 'ikë a 'urakëoxa 'iá 'ikën, ax ka anua Adam kakë ëma 'urama, Saretán 'ikë a 'uramabi 'iakëxa, usa 'ain ka 'umpax ax kuabuti parúm-papa bamakë kakë anubi timékë 'iakëxa. Usakin ka Diosan anúan Israelkama Jericó kakë ëmanu kuani sikarakënun bakanu 'ikë 'umpax tèa rabëti ësikinun 'imiakëxa. ¹⁷Usakian Jordán kakë baka ësikinun 'imikëbë Israel unibu sikarakëmainun ka sacerdote unikama anua a tanti Diosan bana 'ikë bunántisa okin 'akë, kurin ratakakakë buánkë unikama ax Jordán kakë baka éskia me rakákë a nëbëtsi kamabi uníxa sikarakëmainun nirakëakëxa.

**Mapai rabé 'imainun rabé
maxax Jordán kaké baka
ëskiké anua bia bana**

4 ¹Usai kuania kamabi Israel unibunëx Jordán kaké baka sikarakëti sënëan ka Nukën 'Ibun Josué kakëxa: ²Mapai rabé 'imainun rabé uni kamina achúshi achúshi ñaká uni anua kaisti 'ain, ³a kamina kati 'ain, mapai rabé 'imainun rabé maxax anuaxa baka téarabëti ëskiké anua sacerdote-kama nirakéké anuabia achúshi achúshi maxax bibiakín uinu kara ñantabukëbë bëankibutia anubi buánun kati 'ain.

⁴Usa 'ain ka Josuénen mapai rabé 'imainun rabé uni kaíské a kuënxun, ⁵ësokín kakëxa: Jordán baka ëskiké nëbétsi anua Diosan bunántisa okín 'aké kurín ratakakaké 'iké anua kamina mitsun achúshi achúshi ñakánu 'iké unín maxáx 'iarukín mapai rabé 'imainun rabé sënëen 'itanun bití 'ain. ⁶Akamax ka a isi numi sinania nun rëbúnkíkama ënuxun ka Diosan atu 'akínkin ñu cháiira 'akëxa kixun sinánti 'iti 'ikën, sinánkin ka mitsun baké bëchikékaman ñukáti 'ikën: ¿Uisoti nan kara ëné maxákama ënëx 'ik?, ⁷kixun ñukákëxun kamina mitsun kati 'ain: Ax ka Nukën 'Ibun bunántisa okín 'aké kurín ratakakaké a sacerdotekaman Jordán kaké baka sikarakëkínkin rëkuémibiankëbëa baka téarabëakëxa kixun kati 'ikën. Ëné maxakamax ka Israel unibunëan ënuax ka usai 'iakëxa kixun sinánti 'ikën.

⁸Usokian Josuénen kakëxun ka an kakësabiokín. Jordán kaké baka panárabëti ëskiké anua, mapai rabé 'imainun rabé maxá achúshi achúshi Israel unín bibiankin anua 'ikanké anu buánxun maburukín nankëxa, usokín 'anúan Nukën 'Ibun Josué kakësabiokín. ⁹'Amainun ka Josuénenribi mapai rabé 'imainun rabé maxáx bixun anua sacerdote-kamax bunántisa okín 'aké kurín ratakakaké anua Diosan bana usai 'iti 'aruké a 'iax baka ëskiké nëbétsi sëtéké anubi bukunrukin nankëxa. A maxákama ka bërfíbi anu 'iké kixun ñuikín atun aintsikama ñuixunkankëxa.

¹⁰Usa 'ain ka sacerdotekama bunántisa okín 'aké kurín ratakakaké anua usai 'iti bana 'iké an uanké akamaxa Jordán kaké baka téarabëti me rakáké anu sëtémainun Israel unibunën usokín 'anúan Nukën 'Ibun Josué kakësabiokín ka kamabi ñu 'akëxa. Usakín 'aminuan Moisésnen Josué kakësabiokín. 'Akëbë ka anuax unikama bënëtishi sikarakëakëxa, ¹¹usai unikama sikarakëti 'ukëmanan 'irui sënënkëbë ka sacerdote unikama an bunántisa okín 'aké kurín ratakakaké anua Diosan ñukama 'iké uanké atúxribi sikarëkëkiani kuankín unikama inubiani rëkuéñkiankëxa. ¹²Kuankëbë ka atu kaxuribi axa 'akánanti 'unáinraké unibu Rubénen rëbúnki, akamabë Gadrén rëbúnki 'imainun Manasésnen rëbúnkíkama 'itsamashi akamaribi. Anúan

'akánanti mēníokēishi 'aish sika-rakēkiani Israel unibu kuankēxa, usaía 'inun Moisés kiásabi oi ka usai 'iakēxa. ¹³Kuani ka atux cuarenta mil uni sēnēn 'iti urama 'iakēxa, usa 'aish ka 'akanantishi 'inun mēníokakēishi 'aish rēkuēnkiani kuamainun a inubiani Nukēn 'Ibun ismainunbi anua Jericó me 'ikē au kikiani kuankankēxa. ¹⁴A nētēn ka Nukēn 'Ibun kamabi Israel unibu Josuénēn usakin űu 'aia isi rakuékin aín bana tankin an kakēsabiokin 'anun 'imiakēxa, Moisés űukēma pain 'ixun 'amikēxua abētan űu 'asarabi okin ka usokin 'akēxa.

¹⁵Usa 'ain ka Nukēn 'Ibun Josué kakēxa: ¹⁶Sacerdote unikaman bunántisa okin 'akē anua Diosan bana kuēnēokē 'arukē an buánkēma unikama a kamina kati 'ain Jordán baka panárabēti ēskikēbēa me rakákē anu sētékēkama a kamina kuaitanun kati 'ain. ¹⁷Kakēxun ka Josuénēn anuaxa kuaitanun kixun atu kakēxa, ¹⁸kakēxa bēnētishi Jordán kakē baka anua atux sētékē anuax kuaini kēñurukin me amákēbēishi baka chitékē ax anubi rakarakētēkēnkin kamabi maputékēankēxa.

¹⁹A nētēan Israel unibu Jordán kakē baka anun sikarakēkē anun ka mapai rabé nētē 'ianan achúshi 'uxē 'irutabakē anun ka Guilgal kakē anu nukúkankēxa ax ka amíaxa bari urukē Jericó kakē ēma 'urama 'iakēxa. ²⁰Anu ka Josuénēn mapai rabé 'imainun rabé maxax Jordán bakanua bitsínkin bēkē a

bukurunun 'amiakēxa. ²¹Anuxun ka Israel unikama kakēxa: Mitsun bakē bēchikē kaman ka mikama űukánuxun 'aia. ¿Uisoti kara ēnē maxákama unin ēnu buküankē?, ²²kixun űukákēxun kamina ēsokin űuixukanti 'ain uisai kara Israel unikama Jordán kakē baka panárabēti me rakarakēkēbē anun sikarakēti 'iakēxa kixun, ²³'imainun kamina ēsokinribi űuixunti 'ain uisakin kara Diosan Jordán kakē baka meishi rakátanun anun nux inúnun ēskimiakēxa kixun, béráma parúmpapa xónsa kakē anun nun chaitiokēkama sikarakēnun 'imiasaribi okin. ²⁴An ka usakin űu 'akēxa kixun ka kamabi menu 'ikē unin Nukēn 'Ibu ax ka kushiira 'ikē kixun 'unánti 'ikēn, usa 'ikē kamina ashi mitsun Nukēn 'Ibu ikē rabiti 'ain.

Israel unibu Guilgal kakē anu bēbax 'ikan bana

5 ¹Kamabi amorreo unibunēn 'apukaman ka amía bari kuabúkē Jordán kakē baka a 'urama 'ikē 'imainun kamabi cananeo unikaman 'apu axa parúmpapa Mediterráneo kakē a 'urama 'ikē, akamanbi ka Nukēn 'Ibun Jordán kakē baka anúan Israelkama sikarakēnun ēskinun 'imikē kuakēxa, kuati ka 'aisamaira israel unibumi rakuéti abē 'akánanti sinánma 'ikēn.

²Bētsi nētēn ka anuxun Nukēn 'Ibun Josué kakēxa, 'itsamashi maxá kuēnukin 'atankēxun kamina anun amiribishi israel

unibukama aín nètokë ñu maxaka tëakin 'unánti opabuinti 'ain. ³Kakëxun ka Josuéñen maxáx kuënuKin 'atankëxun kamabi Israel nukëbënë unikama aín nètokë ñun maxaka matá me Aralot kakë anuxun tëapakëxa. ⁴Usakin ka aín nètokë ñu rëbu maxaka tëakankëxa, kamabi ax suntáru 'iisa nukëbënë unikama ax Egipto menuax ai anu uni 'ikëma me anuax këñuti maëi néa 'ain. ⁵Kamabi unikama Egipto menuax kuankë axa aín nètokë ñu rëbu maxaka tëakë aínbi ka kuania anu uni 'ikëma menuax bakënkiankë akamax aín nètokë ñu rëbu maxaka tëakëma 'iakëxa. ⁶Usai kuani ka anu uni 'ikëma menu, cuarenta baritia 'imi nitsi axa Egipto menuax chikíkiani kuankë unikama maëakëxa. A unikaman ka Nukën 'Ibun kakë-sabiokin ñu 'aisama tankëxa, usa 'ikë ka an sinanatëkëntima okin atu ësoKin kakëxa, mitsux kamina a me 'inánuxun 'ën min chaitio-këkama ka anua 'aisamaira a piti ñu 'imainun a xëati ñu 'itsaira 'ikë a menu kuantima 'ain. ⁷Usa 'ain ka Josuéñen atun papa ñua 'ain, aín bakë bëchikëkaman nètokë ñu rëbu maxaka tëapakëxa, ax ka Nukën 'Ibun aín papa ñukëbëtan usokin 'ati kia 'iakëxa, usa 'aish ka bërámabi aín nètokë ñu rëbu maxaka tëakëma 'ikankëxa, atúxa kuankëbë ka anúan usakin ñu 'ati nëtë 'aíma 'iakëxa. ⁸Usakian aín nètokëñu rëbu aín maxaka tëakin sënëonkëx ka anua 'ikankë

anuaxpain pëxkúti anu pain 'ikan-këxa. ⁹Anuxun ka Nukën 'Ibun Josué kakëxa: 'ËsoKin aín nètokë ñu rëbu aín maxaka tëakë ënën ka egipcio unibunën aín menuxun ñu mëia tëmëra a sinani katékë a ëmiti 'ikën. Usakin anuxun 'axun Guilgal kakin anëa 'aish ka a me usakinbi anëké 'ikën. ¹⁰Usa 'ain ka Guilgal kakë anu pain israel unikama 'iakëxa, mapai rabé 'imainun rabé 'imainun rabé nëtë a xupibukëbëtan ka anua 'ikankë Jericó 'uramanuxun Pascua nëtë inúkin fiesta 'akan-këxa. ¹¹A nëtënbi ka anun chamiti ñukëñunma 'akë pán këñun trigo tutush okë pikankëxa, pionkë a pëkarakëbëtan ka a menu 'apákë bikë ñu aribi pikankëxa. ¹²Usakian ñu 'apákë aín bimi pikin pëukë 'ain ka atúan pikë maná ax nëtéti amiribishi 'ibútëkëama 'ikën, usai 'ikëbëtan ka a barin Israel unibunën Canaán menu 'apákë ñukama ashi bixun piakëxa.

**Josué Nukën 'Ibun
suntárunën 'apubë
mërana ñuikë bana**

¹³Achúshi nëtën Jericó 'urama 'ixun ka Josuéñen, ami achúshi uni aín manë xëtokë tuianx a bëmáno nikë isakëxa. Isi a 'urama obiani kuankin ka ñukákëxa:

—¿Mix karamina nubë 'ikë kama a 'ain, ama 'aish kaina numi nishkë unikama a 'ain? ¹⁴—'Ëx kana axa mimi nishkë uni a 'ianan axa mibë 'ikë uni ama 'ain —kixun ka axa ami mërakë

uni an kakëxa—. 'Ëx kana Nukën 'Ibun suntárukama aín 'apu 'ain. Ësakian uni an kakëxun ka Josuéñen rantinpuruni aín bëmá-nanën me tikai tsóbukin ñuká-këxa:

—¿Añu 'axúnumi 'ë kanun kara Diosan mi xuax? ¹⁵Kakëxun ka Nukën 'Ibun suntárunën 'apun kakëxa:

—Min taxaka kamina ëchiti 'ain, anumi nikë me ënëx ka bëtsi me kamasama upíira 'aish Diosnan 'ikë kixun kakëxa. Kakëxun ka Josuéñen aín banatankin an kakë-sabiokin 'akëxa.

**Uisokin kara Israel
unibunën Jericó 'ati
'ikë kixuan Diosan
Josué ka bana**

6 ¹Usa 'ain ka anun Jericó ëmanu atsínti xëpúti upíokin xëpukë 'ain anu tsókë unikamax uíxbi atsinima 'imainun chikíamabi 'ikën Israel unibumi rakuékin upíokin xëpukë 'ain. ²Usokin 'akë 'ain ka Nukën 'Ibun Josué kakëxa: 'Ën kana Jericó ëmanu 'ikë 'apu, aín suntárukama këñunbi 'anun mi 'amiti 'ain. ³Usa 'ain ka Israel suntárukamax achúshi nëtën nëtën achúshishishi mapai achúshi 'imainun achúshi nëtë sënëmi, Jericó ëma kaxú kuainakëti mañati 'ikën. ⁴Usai 'ikëbë ka mapai achúshi 'imainun rabé sacerdotekama atúnribi bunántisa okin 'akë, kurin ratakakakë anua Diosan bana kuënëokë 'arukë a buani kuankin

achúshi achúshi unin a banoti 'akë carnero manchan, buámainun ka mapai achúshi 'imainun rabé nëtë sënënkëbë ëma ratanarati mapai achúshi 'imainun rabé ó kuainakëti 'ikën, usaía 'imainun ka sacerdotekaman aín carnero manchan a banoti 'ikën. ⁵Usakin banokian aín sënënkë a upíira 'inun tsiskëpakín 'aia kuation kushiira kuënkënkëbë ka anun ëma bëararakin këñëara ax rurukubuti 'ikën. Usai 'ia isi ka suntárukama ëmami kikiani kuantí 'ikën.

⁶Usakin katankëxa Dios sënëan ka Josuéñen sacerdote unikama kuënxun kakëxa: Míkaman kamina bunántisa okin 'akë kurin ratakakakë anua Nukën 'Ibun bana kuënëokë 'arukë a buánti 'ain, buámainun ka mapai achúshi 'imainun rabé mikamax bunántisa okin 'akë kurin ratakakakë a inui rëkuënkiani kuankin a banoti 'akë carnero manchan a buani rëkuënkianti 'ain. ⁷Usakin katankëxun ka Josuéñen a ëmanu 'ikë uni kamarairi kakëxa: Mitsux kamina ëma ratanarati kuainakëti kuantí 'ain. Kuamainun ka axa 'akanantishi suntárukama ax bunántisa okin 'akë kurin ratakakakë a rëkuënmibiani kuantí 'ain.

⁸Usokin 'anúan Josuéñen kakëxun ka kamaxunbi an kakë-sabiokin 'akëxa. 'Amainun ka mapai achúshi 'imainun rabé sacerdotekama ax anu Diosan bana kuënëokë 'arukë bunántisa okin 'akë a buánkin rëkuëmbiankin mapai achúshi

'imainun rabé atun carnero manchan banoti 'aké a banobiani kuankëxa, kuankëbë ka an bunántisa okin 'aké kurin ratakakaké an buánkë akamaxribi a kati kabiani kuankëxa. ⁹Kuamainun ka axa 'akánanti suntárukama ax sacerdotekama rëkuémibiani kuankëxa, kuanmainun ka ax tsiankianké akamaxribi atu kaxú kuamainun, sacerdotekama atúxribi kuankin ênkinmaira carnero manchan banobiani kuankëxa. ¹⁰Aínbi ka Josuénen êsokin suntárukama kakëxa, unékiani kamina ñuítsima rikianti 'ain, 'ên mitsu kuënkëni munuma sharánun kakëx kuni kamina kuëenkëni kushin sharákanti 'ain.

**Israel unibunën Jericó
kakë ëma bia bana**

¹¹Usakian Josuénen 'amikëxun ka achúshi okin ëma ratanarakin bunántisa okin aké Nukën 'Ibunan a buánkëxa. Usakín buanx utëkëntankëx ka anu achúshi imé inúmi 'ikankëxa. ¹²Inëti pëkarakëma 'aínshia, Josué nirukëbëtan ka sacerdotekaman bunántisa okin aké kurin ratakakaké anua Nukën 'Ibun ñukama 'aruké 'iakin biruakëxa. ¹³Birukëbë rikiani ka mapai achúshi 'imainun rabé sacerdotekama ax anunbi bunántisa okin aké kurin ratakakaké a buámainun rëkuénkiani kuani aín carnero manchan banoima kuankëxa. Kuankëbë ka axa 'akánanti suntárukama axribi rëkuénkiani kuanmainun, aín patsan axribi

a kaxú kuankëbë ka. An carnero manchan banókë axribi nirakëtimaira kuankin banoia kuakëxa. ¹⁴Usai 'iónxa pëkaran ka amiribishi rikiantëkëanx ëma 'uri amiribishi mañarakëakëxa. Usai ka mapai achúshi 'imainun achúshi nëtë inúmi 'ikankëxa.

¹⁵Usai 'ikë mapai achúshi 'imainun rabé nëtë 'ikë anun ka pëkarakëma 'aínshi tsuakirikianx ëma 'uri mañarakëtëkëankëxa, bërâma 'ikësabi oí, ka a nëtën mapai achúshi 'imainun rabé oi ëma uri mañarakëtëkënkëkëxa. ¹⁶Usakian sacerdotekaman aín manë banañu banokin mapai achúshi 'imainun rabéokin 'akëbëtan ka Josuénen unikama kakëxa: ¡Munuma kuënkëni kamina sharati kiti 'ain! Nukën 'Ibun ka ëné ëma 'atima onun nu amia usa 'ain kananuna 'ati 'ain. ¹⁷A ëmax ka anu 'ikë ñukama këñunbi rurapakin 'aisama oti 'ikën, usakín 'anun ka Nukën 'Ibu ki axa. 'Anan kamina bëtsi bëtsi unibëa 'ikë xanu Rahab kakë a 'imainun aín xubu 'ukëmëu abë timékë aín aintsikamaishi uisabi otima 'ain, an ka atun ëma ñachati xuké uni rabé a unëaxa. ¹⁸Aínbi kamina mitsun, a ëmanu atsínkin anu 'ikë ñukama achirabi bitima 'ain, mitsumi anu 'ikë ñukama bikëbëtan ka anu Israel unibu nux 'ikë aribi Nukën 'Ibun 'aisama oti 'ikën. Usakín 'akëbë kananuna nukamax 'aisama oké 'iti 'ain. ¹⁹Aínbi ka anua 'ikë kuri, manë uxua, 'imainun kamabi ñu manë

panshian 'imainun manë kashtá 'akë a ñukamaishi anu ñu kupíira kupíkë Nukën 'Ibunan 'inun nanti 'akë anu nanti biti 'ikën.

²⁰Usai ki Josué sënënkëbëtanshi ka aín carnero mancha bano-kankëxa. Bana oia kuatishi ka Israel suntárukamax, munuma kuënkëni sharati kikankëxa. Kikëbëshi ka ënën menma buinarakin ëma kënëarakë ax ruruku-buakëxa. Usaia 'ikëbë ami kikiani abákiani kuankin ami bëbarukin ëma 'ibuakankëxa. ²¹Usokin 'akinshi ka aín manë xëtökën anu ikë unikama, xanu, uni bënábu, këñunbi uni apan akamabi këñukin 'anan atun 'arakakë ñuinakama oveja, burro akamaribi këñukin 'akëxa. 'Akin ka ñuñuma 'ítanun kamabi këñuakëxa.

²²Uso mainun ka Josué nën an me ñachatia xukë uni rabé a kakëxa: “Aín xubunu kuanxun kamina bëtsi bëtsi unían aín nami 'akë xanu a bianan aín xubunu 'ikë aín aintsikama aribi mitsun mi usakin 'akinuxun kakësabiokin biti 'ain.”

²³Kakëx aín xubunu kuanxun ka a uni rabëtan an kakësabiokin Rahab aín xubunua aín papa aín tita aín rarëbakë 'imainun aín xukën 'anáka bianan aín aínsi 'ibukamaribi biakëxa, bibiankin ka anua Israel unibu bukukë 'uri anuxuan atun bërúantinu-bi buánkëxa. ²⁴Usokin 'atankëxun ka Israel suntárukaman anua ikë ñukama këñunbi a ëma néankëxa. Néanan ka anua kuri 'imainun manë uxua kamabi

ñu manë panshian manë kashtá 'akë akama upíirabu 'ashi Nukën 'Ibunan 'iti nankë ñu anu nanti biakëxa. ²⁵Aínbi ka Josué nën Rahab 'imainun aín aintsikamainshi, Jericó ëma ñachatanun xukëx kuankë uni rabé 'akatsikixun barikaniabi unëkë a kupín uisabi okima biakëxa. Usa 'ain ka Rahabnën rëbúnkikamax israel unikamabë upitax tsóakëxa. ²⁶Usokin 'atankëx ka Josué ësai kiakëxa: “Nukën 'Ibun ka 'ëx kikë bana ënëx ka aséribi 'ikë kixun 'unánia, uin kara Jericó ëma 'atëkënkin birutëkëntisa tania a unin bëchikë apanëx ka anun ëma bëararakin kënëkë ax ami rurukubukin chakakëx bamakë 'iti 'ikën, 'imainun ka aín bëchikë 'anáka aribi anun ëmanu atsínti xëputi 'akin amibi birukin 'akë a chakamikë 'iti 'ikën” (kiax ka Josué kiakëxa). ²⁷Usokin Nukën 'Ibun 'akin-këxa Josué nën ñu 'aia ka ax ka kushiira uni 'ikë kixun unin ñuia kamabi menu 'ikë unin kuakëxa.

**Israel unibunën amorreo
suntárukama abë
'akanankin abámia bana**

10¹⁻²Adonisédec kakë uni ax ka Jerusalén ëmanu 'apu 'iakëxa, anuxun ka Josué nën abë 'akanankin Ai kakë ëmanu ikë suntárukama këñukin 'axa kixun ñuñña kuakëxa, Jericónu 'ikë 'apu aín unikama këñunbi 'akësaribi okían këñúkë kuati ka 'itsaira rakuëkankëxa, 'imainun ka gabonita unikamabë ka israel

unikamax bēri atubē timēax tsotia kixun ñuikania kuakēxa. Usai atux 'ikē kuatira ka 'aisamairai rakuēkankēxa, Gabaón kakē ëma ax ka chaira 'aish Ai ëmabētan sēnēnma upīra 'iakēxa, usa 'aish ka anu 'apu 'iisa 'aishbi a ëmanu 'apu 'aíma 'iakēxa 'imainun ka anu 'ikē suntárukamax 'aká-nanti 'unánbuira 'iakēxa. ³Usai 'itsaira rakuékin ka Adonisédec Jerusalénnu 'ikē 'apu an ñakáitsinu ikē 'apukama katánun xukin kamia a ka ënēkama 'iakēxa Hoham, Hebrónnu 'ikē 'apu 'imainun Jarmut, kakē ëmanu 'ikē 'apu Piram 'ianan Jaffa Laquisnu 'ikē 'imainun Debir Eglón anu 'ikē 'apu akamabi kamiakēxa: ⁴“Kamikin ka ësokin katánun kixun kamiakēxa, nukama kamina Gabaón unikamabē 'akanania 'akini uti 'ain, atux ka Josué Israel unibubē 'akananima atubē nuibanani birananza.” ⁵Kamikēx ka mapai achúshi amorreo 'apukama abē Jerusalénnu 'ikē ax biranankēxa, atux ka Hebrón Jarmut, Laquis 'imainun Eglón akamax timēkiani atun suntárubē Gabaónnu 'ikēkama 'akatsikiax kuankēxa.

⁶Usaia atu 'akatsi kix timēkiani kuankē, kuakin ka Gabaón ëmanu 'ikē 'apun, Josué Guilgal menu 'ia ësokin kamiakēxa: 'Ën kamikēx kamina kana kuanima kix kima an mi ñu mēëxunti unikama ënē mix kikēsabiokin 'akini min suntárukamabēbi uti 'ain. Aín bashinu tsókē Amorreo unibunēn

'apukamax ka aín suntárukamabēbi timēkuatsini nu 'akatsikiax uaxa. ⁷Ësokian Gabaónu 'ikē 'apun kamikēx ka Josué Guilgalnu axa rakuétimaishi 'akanankē ain suntárukamabē küancēxa, ⁸timékē ka Nukēn 'Ibun Josué kakēxa: mitsun kamina amorreo unikama rakuēkimaishi, mi kupitanuma 'ati 'ain.

⁹Usakian Diosan kakēx ka Josué anua 'ikē Guilgal kakē anuax aín suntárukamabē imē kuanēkin ñu sinánkēmabi ratukinshi amorreo unibu 'akēxa. ¹⁰'Aia ka Nukēn 'Ibun israel unibunēn 'akēxa 'itsaira atumi rakuēnun 'imiakēxa, usaía 'ia ka Josuéñēn suntárukaman anuaxa 'akanankē Gabaón anuxun 'aisamaira amorreo unibunēn suntárukama 'akēxa. Usokin 'akēxa anun Bet-horónnu, kuanti bai a bibiani abatiabi ka nuibiankin amorreo suntárukama Azecá 'imainun Maquedá kakē ëma rabé ami kikiania Israel suntárukaman kuania mērakin 'akēxa. ¹¹'Akēbēa amorreo suntáru rairinēxribi abati Bet-horón kakē ëma ratanbiani israel suntárukaman 'akēx abati kuankēbētanbi ka Nukēn 'Ibun matsin tita aín bēru chairabu 'ibúkin aín manē xētókēn israel suntárukaman 'akēsamaira okin kēñunun 'amiakēxa.

¹²A nētéan Nukēn 'Ibun 'amikēxun israel unibunēn amorreo unikama 'akē a nētēn ka Josuéñēn aín suntárukaman kuamainun Nukēn 'Ibun ñukákin ësokin kakēxa:

Barix ka Gabaón puntë
nirakëti 'ikën;
'imainun ka 'uxëribi Aialón
kakë me puntë ami
nirakëti 'ikën.

- ¹³ Usaia kikëbë ka 'uxë
nirakëmainun
bariribi nirakëakëxa
nirakëkëbëtan ka Israel
unibunën axa ami nishkë
unikama abë 'akanankin
'akëxa.
Ënë banax ka bëtsi kirikanu
kuënëokë 'ikën usaia
Israel unibu 'akanamainun
ka bari naí nëbëtsi
nirakëax achúshi nëtë 'imi
kuabuama a bana ñuikin
'akë 'ikën.

- ¹⁴ Uinsaranbi ka achúshi nëtë
ënë nëtéan 'akësaribi okin
Nukën 'Ibun achúshi unin
kakëxun kuakin ñu 'akë
'aíma 'iakëxa, an ka Israel
unibunën rabanan nékin
ami nishkë uni 'anun
'amiakëxa.

- ¹⁵ Usai 'akanankiani ka Josué
Israel unibubë anua 'ikë Guilgal
kakë anubi kuantëkëankëxa.

**Ashikian Josuéen Israel
unibunën 'apukama
timéxun ka bana**

24 ¹Josuéen ka kamabi
ñaká Israel unibu Siquem
kakë ëma anu timéun kixun
kamiakëxa. Kamikin ka uni apan-
kama 'apu an bana mëníokë
akama 'imainun, suntárunën
kushikama anuxun Nukën 'Ibu

rabiti xubusa okin chupa 'akë
'urama anu timéun kamiakëxa,
²kamikëx rikuatsinkë ka Josuéen
kamabi unikama kakëxa:

—Ësokin 'ën mitsu kanun ka
Israel unibu nun Dios kixaxa:
Bërámaira ka Térax 'imainun aín
bakë bëchikë rabé Abraham kakë
'imainun Nahor mitsun chaitio-
këkama, atux Éufrates kakë baka
kuëbí tsókë 'ixun bëtsi dios-
kama rabiakëxa. ³Rabia kana
Éufrates kakë baka kuëbí anua
Abraham, chikínbiankin Canaán
kakë mekama oi ninun 'imiakën.
'Imianan kana aín bakë bëchikë
Isaac a pain bëchinun 'amiakën,
⁴'amikëxun ka aín bakë bëchikë
Isaacnën Jacob 'imainun Esaú
a rabé pain bakë bëchiakëxa.
Usoxun kana Esaú Seír kakë me
anu tsónun 'inánkën, 'inámmainun
ka Jacobnëx aín bakë bëchikë-
kamabë Egipto kakë menu tsóti
kuankëxa.

⁵Usai 'iá 'ain kana 'itsa baritia
inúkëbëtan 'ën mitsun chaitio-
kë Moisés 'imainun Aarón xuakën,
'imainun kana mitsux chikinuxun
Egipto menu 'ikë unikama 'itsaira
'ën tëmëramiakën. ⁶A nëtéan
mitsun chaitio-
këkama Egipto
menuax chikí-
kë anun ka egipcio
suntárukaman anuax 'akanankë
caballonën nikinkë 'imainun
caballonën kuankiribi parúm-
papa xónsa kakë anubi bëbaru-
kin 'akatsikixun nuiakëxa.

⁷Usokëxuan atun 'akinun kixun
ñukákëxun kana, bëánkibukë
chairan atu bëaranun 'amianan

parúmpapan kuaniabi mapu-kin egipcio unikama këñunun 'amiakën. Usakin 'aia ka nun chaitiokëman Egipto menuxun isakëxa.

Usai pain 'itankëx ka raírinëx ñumainun 'itsa baritia 'imi anu uni 'ikëma menu niakëxa, ⁸nitsiabi kana anua atu amorreo unikaman menu bëakën, ax ka Jordán kakë baka amiaxa bari urukë au 'iakëxa. Anuax mitsubë 'akananiabi kana, 'ën abámikin mi 'anun mitsu 'amiakën, 'amikëxun abámikin 'axun kamina atun me bikankën. ⁹Balac, Sipornën bëchikë moabita unibunën 'apu an pain ka mitsubë 'akánanti sinánxun, Balac an Beornën bëchikë Balaam nusa 'atimokin sinánxuni unun kixun kamiakëxa. ¹⁰'Aínbi kana 'ën Balaamnën usakin 'aisama onun 'amikinma mitsu nuibanun sinánmiakën. Usakin kana mitsu iémiakën. ¹¹Usa 'ain kamina mitsux Jordán kakë baka a sika-rakë kianx Jericó kakë ëma anu bëbakën. Bëban ka Jericó ëmanu tsókë unikama mitsubë 'akanan-këxa, 'akananiabi kana mitsun ira kupitanunma 'anun 'amiakën, 'amitankëxun kana (amorreos, ferezeos, cananeos, hititas, gerge-seos, heveos 'imainun jebuseo) a unikamaxribi mitsubë 'akananiabi kana mitsun ira kupitanuma 'anun 'amiakën. ¹²Mitsunmi amorreos unibunën 'apu rabé aín suntáru-këñunbi 'a ax ka 'akánanti 'unan 'ixunmi manë xëtokën 'anan mitsun pian 'ama 'ikën, 'ën kana

mitsux kuankë 'aímabia atux irapain abánun 'imiakën. ¹³'Ën kana a menu tëa 'ikëmabi mitsun me 'inánan ëmakamaribi mitsun 'a 'ikëmabi 'inánkën. Anu tsókin kamina bërí mitsun 'apá 'ixunmabi uvas 'imainun aceituna akama a menua 'apá 'ikë pikanin.

Ësokin katankëxun ka

Josuénën atu katëkëankëxa:

¹⁴ — Ësokian kamabi ñu an a kupín kamina mitsun Nukën 'Ibu asérabira ami sinánkin rabiti 'ain. Rabikin kamina mitsun chaitiokëkaman Éufrates kakë baka kuëbí tsókin rabianan Egipto menuxun rabia dios a ënkin Nukën 'Ibuira ashi rabiti 'ain.

¹⁵ Usa 'ain kamina mitsun Nukën 'Ibu rabisama tani, bëríbi uisa dios kaina mitsun rabisatani kiox kiti 'ain: Kaina mitsun chaitiokëkaman Éufrates kakë baka kuëbí pain tsókë 'ixun rabia dios, a rabiti 'ain 'akima karamina anumi bërí tsókë amorreo unibunën me anu 'ikë dios akama rabiti 'ai kiox kamina kiti 'ain. 'Aínbi kana 'ën, xanu 'ën bakë bëchikëkamabëbi Nukën 'Ibu kuënkësa oíshi 'iti 'ain.

¹⁶ Ësakin kakëxun ka Israel unibunën ribi kakëxa:

—¡Nun kananuna a rabikinma bëtsi bëtsi dios rabia Nukën 'Ibun

nu ënti kuëenima! ¹⁷Nukën 'Ibu an ka chikínbëtsinkin nukama 'imainun nun chaitiokëkama Egipto menuxun tëmëra kin ñu mëëiabi nu bëakëxa. An ka 'aisa-maira ñu 'akin nun ismainunbi 'akëxa, 'imainun ka bëtsi bëtsi ëma inubiani kuania nu bërúan-kin 'akiankëxa. ¹⁸An ka anun nux uti menu 'ikë ëmakamanu tsóa unikama chikínun 'imiakëxa, usaribi okin ka amorreo axa ënë menu tsóa akamaribi 'akëxa. Usokin akama ñu 'a 'ikë kanaanuna nunribi a rabiti 'ain ax ka nun Dios 'ikën.

¹⁹Usai kikanía kuatankëxun ka Josuéñenribi kakëxa:

—Mitsun kuainxunshi rabiti-sama ka Nukën 'Ibu 'ikën, ax ka Dios upíra 'ianan uisa ñu 'atimabi 'ai ami mitsux 'uchati kuëenima. ²⁰An ka mitsunmi a ënkin bëtsi dioskama rabia, ka Nukën 'Ibu upíokian mitsu 'akinkë a ënkin 'aisamaira okin tëmëramiti 'ikën.

²¹Usakían kakëxunbi ka Israel unikaman Josué katëkëankëxa:

—Usai 'ikima kanaanuna nukaman axa Nukën 'Ibu 'ikë ashi rabiti 'ain. ²²Usai kikanía ka Josuéñen katëkëankëxa:

—Mitsuxbi kamina Nukën 'Ibu ismina rabinuxun 'ai kiaz kikanin. Kakëxun ka —atúnribi nukamanbi kanaanuna a 'ai —kixun kakan-këxa. ²³Kiabi ka Josuéñen kakëxa:

—Asabi ka, usa 'ain kamina mitsun dios isa kixun, 'arakakë ñukama bitankëxun puti 'ain, putankëxun kamina Israelkama

mitsun nuitunënbi Dios amishi sinánkin rabiti 'ain. ²⁴Ësokin kakëxunbi ka Israelkaman amiribishi Josué kakëxa:

—Nukaman kanaanuna Nukën 'Ibu Dios rabiti 'ain, 'imainun kanaanuna uisai 'inun kara ax kia usaibi 'iti 'ain.

²⁵A nëtënbi ka Siquemnuxun, Josuéñen kamabi unibëtan achúshi ñu 'anan Moisésñen usai 'iti banakama kuëñö a 'inánkëxa, ²⁶a bana ka Josuéñen anua a tanti Diosan bana 'ikë anubi kuëñökëxa. Kuëñöotankëxun ka mapara pará bixun xubusa okin chupa 'akë anuxun Nukën 'Ibu rabiti a 'urama 'ikë i pëñanakëkë tëmú anu nitsíankëxa, ²⁷usokin 'atankëxun ka Josuéñen Israel unikama kakëxa:

—Ënë mapara chaiira 'ën nitsinkin nankë ënëx ka, uisakin karanuna nun Nukën 'Ibun 'amikëxun ñu 'akën kixunmi mitsun ñuiti 'inuxun 'aia. Ënëx ka a isia bëtsi unikamax mitsux ismina usai 'iakën kikë ax këmëkësa 'itima kupín kamina upiti Diosmi sinánkanti 'ain. ²⁸Usokin pain katan-këxun ka Josuéñen aín menubia kuantëkëntanun an 'akintia buánkë unikama a xutëkëankëxa.

Josué ñua ñuikë bana

(Jue 2.6-10)

²⁹Usokin pain ñu 'atankëx ka Josué Nunnën bëchikë Nukën 'Ibun uni ax, ciento diez baritiañu 'aish ñuakëxa. ³⁰Ñukë 'ikë ka aín me Timnat-sérah kakë 'ain tsipumia

'ikë Gaas kakë, Efraínnën bashi-kama kakë 'ia anu maíankëxa, ³¹israel unibunën ka Josué ñutisamapan 'aish tsótan Nukën 'Ibu rabiakëxa, rabia 'ixun ka ax ñua 'ain uni apankama an Nukën 'Ibun kamabi ñu Israel unibu 'axunia isa 'ixun 'unánkë unikama atúxribi ñukëma 'aish tsótan rabiakëxa.

**Israel unikaman Josénën
xo maían ñuikë bana**

³²Israel unibunën ka Josénën xo Egipto menua bitsínkin bëínëa

'ixun, Siquem kakë me anu maíankëxa, a mex ka Jacobnën cien kuríki manë 'akë kupín Hamornën bakë bëchikë, Siquemnën papa aín me 'ikëbi marua a 'iakëxa, a me ka Josénën rëbúnkikaman atunanbi 'inun biakëxa.

Eleazar ñua ñuikë bana

³³Eleazar, Aarónën bakë bëchikë ñukë 'ikë ka aín aintsikaman aín bakë bëchikënnën me anua Efraín unibu 'ikë, Finees kakë uni aín me anubi maíankëxa.